



پروفیسور محمد تقی زهتابی

خلقلر زندانی

سحردی تهراندا،
و قال - ماقالدی، یامان ازدحامدی هر یاندا،
آدین هر ایل دگیشن بیر گنیش خیاباندا،
خیلا غرق اولاراق، سالمادان جهانانظر،
آدام سئلیله برابر،
موحیطه وارلیغی بیگانه تک اؤتوب گئدیرم،
گئدیر و سئیر ائدیرم.
او قورناز انگلیسین، شئیطان اینتلیجنتین،
قارا سوران رضاخان سونگوسيله شیشدیریلن
بو هئرت شهرینی من.
قریبه بیر باشکند:
بو یئرده کی، وورولوب ائلرین شوعورونا بند،
آخیر هر ائودن آرزو،
آخار سولار گندوو،
هاواسی توستودو، کاربون، دوماندى، قازدی و چن.
آعاجدا یاپراقلار،
یازین سحر چاغی گؤرسنمز، اوزلرینده قیروو
یئرینده کاربون وار.
قیافه لر توتقون،
عزالیدیر کیشیلر سانکی، قاش - قاباقلی بوتون،
اوچوب، کؤچوب ائله بیل کی، گولوش بو یئرلردن،
و گیزلنیر اومود اؤلموش باخیشلاریندا غضب،
توکنمه یین بیر کین.
زاواللی غنچه اوشاقلار،
بنیزلری حسرت چیچک کیمین سولغون،
کدرلی گؤزلری هئی آختاریر گولوش و طرب،
بو معصوم اوزلره بو غم ایزی قازیلما لیدیر.
و گنجلر ساتیری اوزده رنگ - به - رنگ سیگار،
قاجاق نه وار،
و دولار
و گیزلیجه هئرویین.
ائشیتسه نیز ده اگر گیزلی - گیزلی گاه آدینی،
گؤره نمه سیز قادینی.
گلیر، گئدیر، دولانیر هئی، و لاکین، هر یاندا،
شبح کیمین قارا زیل توربادا، بیر اینسان دا.
قاپی دالیندا نه کی، آنلاییب بیلنلر وار.
شوعور اؤنونده دیوار!
و موزدو آنلاماغین تکلیک،
آجلیق،
اؤزگه دیار،

وطنده ایسه سینیق قول تک اؤزگهیه مؤحتاج،
همیشه آج،
بالاواج،
شکنجه، قورخو، تترور، حبس، قورقوشون، یا دا دار،
همیشه تنهالیق.

سحر بو تهراندا،
آدین هر ایل دگیشن بیر گنیش خیاباندا،
کیچیکجه مئیداندا
پاناشدیم آخیری آستا قزئت ساتان کیبیته،
آلیب باخیم قزئته.
نه وارسا، فارسجادی. بو رسمی دیلدیر البته.
مجله لر سیراسیندا وار "الهدی"،
عرب اوشاقلارینا،
قزئتلرین سیراسیندا وار "الهلال"، "کیهان"،
"شهاده"، "جبهه"، سورا "البديل الاسلامی"،
"لواء صدر"، "الغبا"، "وطن"، "عمل"، "قرآن"...
گؤزوم ایشیقلاندی،
کی، وار هوونیزه لی قارداشلارین دیلینده واراق،
قزئت، مجله نه قدەر ایسته سن اولار تاپماق.
چیلندی قلبیمه شادلیق،
ولئیک بیر آنلیق.
گؤرونجه اوردا "نیوز" و، باشیمدا اسدی سازاق.
کی، وارمیدیر، عجب! انگلیسلی هموطنیم
بو ایرانیمدا منیم؟
یوخ انگلیسلی، ولی کورد واردی بنش میلیون.
هانی دیلینده قزئت؟
هانی به مکتبی، دارالفنونو، علم اوجاغی،
سسسی، صداسی اونون؟
گؤزل او یاللیلاری، اینجه - اینجه نغمه لری؟
گؤزل ترانه لری؟
هانی دیلینده مجله بو قهرامان خلقین؟
الینده حاقینی آلماق اوچون ناغان خلقین؟
سویوق سو قاتدی بو حالت اینان کی، داغ آشیما.
و ووردو قان باشیما
گؤرونجه اوردا جا "ژورنال دو تهران"ین آدینی،
کی، وارمیدیر، عجب! هئج فرانسیز هموطنیم
بو ایرانیمدا منیم؟
او یوخدو، لئیک بلوچ قارداشیم وار اوچ میلیون.
هانی دیلینده قزئت؟
هانی به مکتبی، دارالفنونو، علم اوجاغی؟
هانی صداسی، سؤزو؟
یانیقلی نغمه لری؟
عطیرلی دوزلو و اینجه، گؤزل ترانه لری؟
هانی دیلینده مجله بو مهربان خلقین؟
او یوخدور، اما گیلک قارداشیم وار اوچ میلیون.
نه مهربان، نه صمیمی، نه ساده بیر میلت!
اؤزو،

کلامی، سؤزو،
 ایلاهی نغمه، اونوندا خزر کیمین بولاغی!
 هانی دیلینده اونون بس قزئت؟
 هانی دیلینده مجله، کیتاب و علم اوجاغی؟...
 دگیردی بئینیمه قورشون کیمی موسلسلدن
 بو سورغولار، بو سوآللار،
 و بیر - به - بیر کئچیریردیم گؤزومدن اوردا نه وار
 کی، غفلتا
 قاماشدی قلب گؤزوم،
 سئوینجدن،
 کیبیتده دالدا بوجاقدان،
 ساتاشدی چونکی گؤزوم
 اثرمنی حریفلرینه.
 اومود پیچیتیلاری دوغدو تتر ایچیمده گننه.
 وار آتمیش مینه جان
 اثرمنی ده هموطنیم،
 بو ایرانیمدا منیم.
 باخاندا اثرمنیچه حرفلر یانیندا هامان
 وار ایدی هم آسوری خطی اوردا، هم عیبری.
 بولاردا بیر قدری قلییمی سئویندیردی،
 کی هر بیرینده اولار نئچه مین ده هموطنیم،
 بو ایرانیمدا منیم.
 وئرلمیش اونلارا قانونجا حق و حریت،
 قویولموش آدلاری چون مذهبی اقلیت.
 نه یاخشیدیر!، نه گؤزلدیر!
 کی، آزیغیندا دیلینده ساتیشدا واردی قزئت.
 دموکراسیدیر، آزادلیق، بو اینسان حاقینا یولدور،
 بو ایش نه ساغدی، نه سولدور.
 حقیقتین اؤزودور،
 سؤزون ده لاپ دوزو دور.
 ولی تورکمن؟
 گؤزل دیاری و بیر میلیون قدهر ده سای،
 امکده تر آخیدان،
 بیلمه دن
 قیشی و یایی،
 مگر دئییل منیم اونلاردا ایندی هموطنیم،
 بو ایرانیمدا منیم؟
 هانی دیلینده قزئت؟
 هانی به مکتبی، دار الفنونو، علم اوجاغی؟
 مجله سی، کتابی، نغمه سی، هنر چیراغی؟
 بو آغ قیزیل یاتاغی،
 گؤرن اونوتدومو آت چاپماغی، اوخو و یایی؟
 دئییل اقلیت؟
 بو اللمین دئییل، اونمین دئییل ده میلیون دور،
 هانی دیلینده اوخول؟
 هانی دیلینده رومانلارلا بیرگه دیوانلار؟
 ندیر بو اصول؟
 ندن سایلماییر اونلار

یهودی تک میلت؟
 گۆرن نه دیر عیلت؟
 بولار بیر اولسالار ایراندا گر، اولار اوندور،
 کی، بیزده سایلاری اولماز یقین کی، اون مین ده،
 ازیلمز اسلام اولان یئرده بونجا بی دین ده!
 نه دیر بو وحشیت؟!
 نه دن بو ضدیت؟!
 سبب بودورمو فقط تورکمن موسلمان دیر؟
 اونون کیمیندی بلوچ، کورد، عرب، زاواللی گلیک؟
 سبب بودور کی، بولار تابعین قوراندیر؟
 دئمک بو قایدا، بو قانون، بو رسم - ایراندا
 کی، هانسی بیر میلت
 قبول ائدیرسه موسلمانلیغی و قورآنی،
 گرک اونوتسون او میلیتین، اوزون و دیلین
 و فارسجا اؤیرنسن!!
 ائوم زامانی بو قانون!!
 دئمک هر هانسی ائلین
 کی، اولسا حرمتی میلیتی و اؤز دیلینه،
 سئوه رسه تاریخینی، باغلانارسا اؤز سنلینه،
 آتیب قورآنی اینانسن گرک یا باشقا دینه،
 و یا کی، آیریلاراق باخسن آنجاق اوز الینه.
 بودور یاراتدیغی بیر اولکه اینتلیجنتین!!

بو فیکرلر، بو خیاللار
 آخیردی بنینیمه بنیدر زهرلی سنلر تک.
 خیالدا، عالمه بیگانه تک، گزیردیم تک.
 توتولموش ایدی بوتون سانکی گۆزلریمده بیک،
 قافامدا عکسی یوخ ایدی جهاندا هر نه کی، وار...
 بو دمده تاپدیم ایچیمده ایتیردیگیم اوزومو
 و گزدریب گۆزومو
 قزئتترین سیراسیندا آریردیم اؤز سؤزومو،
 بیر آذریجه قزئت،
 یقینیم اولدو بو آندا حقیقی آذری ام،
 یادام فقط اوزومه،
 بیلیمیرم فقط اوزومو.
 بو یئر اوزونده نه میلت، نه خلق وار تانیرام،
 یاناندا اوددا بیری، من ده اودلانیب یانیرام،
 ولئیک یانمارام عالمده تکجه اؤز ائلیمه،
 یادام چون اؤز- اؤزومه.
 بنش-آلتی دیل بیلیرم،
 یادام تک اؤز دیلیمه،
 یادام چون اؤز سؤزومه!!...
 کیبیتده هر یانا باخدیم
 و زیلله دیم گۆزومو
 هر کیتابا، هر واراغا،
 آنام دیلینده قزئت چین و باخدیم هر بوجاغا
 کی، بلکه تاپدیم آزی

بیر آذریجه یازی،
ولی یئرسیز.
بو جین دی، بیسمیل اولوب، سانکی، بوسیتون ایران.
قربیه عالمدیر،
اون اولسا، آلتیسی آذرلیدیر بو توپراقدا،
یوز اولسا، اللی بئشی،
تؤکنده تر تانیمازلار اولار یای ایله قیشی،
نه اود، نه ساختا، بوران،
نه یاخشی یئر نه یامان...
بو ایرانیمدا بوگون هر بو جاقدا،
بلی واریمدی یقین یاریدان چوخ هموطنیم
آذری دیلینده منیم،
اؤتوب عصیرلر اولوبلار بو یئرلرین کئشیگی،
بو یئر ازلدن اولوبدور بو میلتن بئشیگی،
کئچینجه عصرلری عصرلر، اؤتونجه زامان،
توتوب کامان،
چالیب قیلینج، تؤکوب قان،
قویوب بو میلتن جان،
بو توپراغین قوروپوب عزتین، آدین، شرفین
و ساخلایب یاددان
قاریش- قاریش سینیرین، توپراغین و هر طرفین،
دیلکلرین، هدفین.
باش اگمه ییب بو ائل اسکندر نه دارا تک،
نه روما خسرو تک،
نه یزدگرد اولاراق
او ترک اندیب عربه تیسفونو، مئیدانی.
او آستیاک یارادیبیر، اولوب حیاتا کؤمک،
او، قان و ظولم اوچاغی "نئینوا" نی محو ائدهرک
قوتارمیش ائللری غمدن و قتل و غارتدن،
وئریب نجات اولارا ظولمدن، اسارتدن،
اچیب ترقییه یول.
دوغوب بو خلق "ارشک"
کی، قورتاریب یاد الیندن سراسر ایرانی،
قوووب او یونانی
و داغ کیمین دایانیب روما قارشلی بئش یوز ایل.
دوغوب بو خلق ختایی، ایگیت "قیزیلباشلار"،
عرب اسارتینه ماهرانه سون قویاراق
بو گونکو ایرانی جانلار قویوب یاراتمیشلار.
بو گونکو ایرانی ایران ائدن قیزیلباشدیر،
و اردبیللی بئش- آلتی عاغیللی سیرداشدیر.
قازیب دیاریمیزین هر یئرین آساندا قولاق
گلن سس آذریجه، تورکجه نغمه دیر آنجاق.
بودور بو یئرده بو خلقین دونکی حاقی، سایلی،
بو گون ده قویمور الیندن یئرہ بو خلق یایی،
و چوخدو یاریدان ایرانیمیزدا ایندی سایلی.
دئمک بو خلق اقلیت اولمور ایراندا،
او اکثریت دیر.
بو بیر حقیقت دیر،

و هم ده همه‌شه ایرانی حفظ ائدیب قورویان،
و ننگینی اتگیندن قیزیل قانیله یویان،
و فارسدان قاباق ائیله‌ین بو یوردو مکان.
تؤکنده قان،
قویاندا جان،
بو ائل قایاقدان گندر هامیدان.
حقیقت ایسه بولار، بس قزئت دیلینده هانی؟
هانی به مکتبی، دارالفنونو، علم اوجاغی؟
کئچک هله بورادان،
دیلی دیل اولماغا دایر بیر امر الینده هانی؟
بو خلق لال یارانیدیر مگر ازل باشندان؟!
و یا اونون دیلی دؤنمز کی، خلق اولوب داشدان!!
آچاندا وجدانی پاکلار فضولی‌نین غزلین،
گؤره‌لر تورک گؤزلین.
بو آذری دیلی مؤحکمدی سیلیدیریم داشدان،
کسیلمه‌یندیر اونون قایناغی
و ائل بولاغی!
هانی بس اوندان مجله، کیتاب و دیوانلار؟
هانی بو دیلده یایینلار؟
حکایه‌لر و رومانلار؟
جهانی حئیران ائدن اینجه- اینجه نغمه‌لری؟
تاری، کامانچاسی، رقصی، خورو و سوزمه‌لری؟
سه‌گاه تورکه نه اولموش، نه‌دن سوسوب پایاتی؟
کوراوغلو هاردا قالیدیر، هایاندا دیر قیر آتی؟
نه اوینایان گؤزه چارپیر، نه بیر چالان هئراتی،
نه واردی "جان سنه قوربان"، نه واردی "ساری گلین"،
کرم اوزومو داها نازلی اصلی‌سیندن الین؟
محبتین سؤنوب آیا بو یئرده چیلچیراغی؟
و قیز گلین داها دوزمور ندن قاش اوسته تئلین،
و سوسله‌میر داها او اؤرپگین، شالین و یلین؟!
وار اوردان فارس ائلی‌نین، اونجا میلیونون غزیتی،
مجله‌سی، کیتابی هر نه قدهر ایسترسن.
گر ایرانیمدا اولاللی میلیون هموطنیم،
ایگیرمی آلتیسی آذری تورکودور حتماً.
بو اکثریتدیر.
بو بیر حقیقتدیر.
دیلینده یوخدو و لاکین بو ایرانیمدا منیم
نه بیر قزئت، نه وراق،
نه بیر کیتاب، نه مجله، نه مدرسه، نه ده حاق،
نه آذربجه‌نی اؤیرنمگه کیچیک بیر اوجاق.
بولار و بونلارا بنزهر ده هر نه وارسا، یاساق.
اوجوب بشر آیینان اولدوزا باساندا آفاق،
طبیعتین
آچاندا سیرینی اینسان،
او قورناز انگلیسین، شئیطان اینتلیجنتین،
پاراتدیغی بو عنایین کوروش دیاریندا،
قوران کناریندا

و هر یاندا
 کسیرلر خلقلرین دیلرین، اوچوش قانادین،
 دانیرلار آدین.
 قریبه دؤوراندير
 کی، بیر اقلیت
 دانیر، بوغور و کسیر اکثریتین دیلینی،
 بوکور، قریبه دی، حمزه کوراوغلونون بئلینی،
 قریبه دیر! تپه نین داغ الینده زینداندير!!
 سبب ده تکجه بودور کی، بو توپراق ایراندير،
 گوناھ ایسه بو کی، آذر ائلی موسلماندير،
 اوگونده دیر کی، بلوچ، کورد، عرب و تورکماندير.

گون اورتا تهراندا.
 گلن، گندن، باغیران، هایدی کویدو هر یاندا.
 آدین هر ایل دگیشن بیر گنیش خیاباندا،
 شهرده هر یاندا،
 گونش اوديله بئله آغنايیر سمادان سس،
 قولاقلاری کار ائدن گور صدالی بیر وئرلیش،
 دؤیور بئیینلره هئی سانکی بیر زهرلی یاغیش،
 قولاق بو سسدن اولور کار، بئیینسه جینگیلدير،
 عذاب ایچینده دی سسدن اوشاق، بؤیوک، هر کس،
 توتور آچیقجا گزنده دوروب باخاندا نفس.
 بشر نه جور یاشاییر بوردا، ائی عجب! یای، قیش؟!
 گورنمه سیز ایدا بیر اوچان فضا سیندا،
 حیاتا، چونکی گرک یوخ اونون هاواسیندا.
 بو جاقلارا سیغینان ایت، زاواللی زینگیلدير،
 ماشینلار اینله ییری ساغلیغین عزا سیندا،
 سیخیر بو درد یامان وارلیسین، گداسیندا.
 بو سس بو شهرده وار هر بیر آندا، هر یاندا.
 گورولتولو بو یاینلار سراسر ایراندا
 همیشه فارسجادیر، داخیلی وطنداش اوچون،
 نه آذری، نه بلوچی چه دیر، نه تورکمنجه،
 نه کوردیجه، نه گیلکجه، نه لورجا، اثرمنجه.
 نه دردینه دگه جکدیر بولار لورون، بلوچون؟!
 نه آنلابار اونو تورکمن، گیلک و کورد نه بیلر؟!
 اولار دئیل می بشر؟
 بو یئرده یوخ بو وطنداشلارین دیلینده خبر،
 ولتیک وار بو یاینلاردا روسجا، آلمانجا،
 فیرانسیز، انگلیسی، هند، چین و اسپانجا،
 نه دیلده ایسته سه نیز.
 عربجه وارسادا، قانماز هووئیزه لی باجیمیز.
 فقط بو ویراندا
 وطن دئییب یاشایان ائللرین دیلینده فلا!

مگر بو یئرده بو گون یوزده سکسنین دیلی یوخ؟!
 بو شوبهه سیز اولای بیلمز.
 دیلی یوخ ائل کی، تاپیلماز، تاپیلماز حیوان دا.

ووروردو قلییمه سانکی بو فیکر پئیده ر اوخ.
قزئت ساتان کیبیته آستاجا یاخینلاشاراق
دئدیم:

آقا! باغیشلایینیز، وارمی آذربجه قزئت؟
بو آذری سؤزو دگدی آغیر سؤیوش تک اونا.
بو سؤزله دوشدو بیره تاجیرین آچیق دونونا.
دؤنوب منه دوه تک باخدی، سانکی نالبنده،
بوزوب دوداقلارینی، نفرتیله قارپیناراق،
گؤرور امام، ائله بیل، آلاهی دانان بنده،
قاشین چاتیپ منه پیس ایری- تیری بیر باخاراق
سوروشدو فارسیجا:

- بیگانه سن؟

- یوخ، ایرانلی.

هایانلیسان، هارادان گلمه سن؟

- پولاسمانلی،

سهندلی، ساوالانلی.

- بو آذربجه قزئت فیکری بس نه دیر سنده؟

اولار بو قورخولو افکار تکجه دوشمنده،

نه آذری؟ بورا ایراندی، فارس اولار آنجاق،

آغیرلیق ائیلهمه سین، آی کیشی باشین بدن،

دبرتمه بیرده بو قورخونج سؤزدن اؤترو چنه ن،

باشین سالیب آشاعی، دینمه، سوس و رد اول گئت:

نه آذربجه قزئت!!

بو یئرده چیگنینه اولموش سوار "رکسانه"

بؤیوک سکندرین، آیا بیلیرسینیز، یا نه؟

اؤزون ده فارسی اوخو، ائولادان دا فارس اؤیرت،

بو ایشله هم فخر ائت.

نه قدری کی اوخوسان واردی فارسجا قزئت،

یا آل، یا رد اول گئت!

قریبه بیر توپراق!

سورنده حؤکم دونن، سؤزده بوردا آزادلیق،

بؤیوک تمدنون اوردا دؤینده داروازاسین،

اولاردی دایم آزادلیق بیخوولو، حاق دوستاق،

و حؤکم بوردا سوروردو همیشه وحشیت،

و خلقلر توتا بیلمیردی اؤز دپلینده یاسین،

و ایندی بوردا اسرکن قورآن دئین پایراق،

عدالت- ازلی دن گئنده صؤحبت آچیق،

سالاندا هر یانا های- کوی صدای حریت،

ساچاندا نوروو سؤزده حیات اسلامی،

قویاندا دؤوره- طاغوتا سؤزده سون آرتیق،

اولاندا محو اسارت و ظولم ایامی،

چیخاردا بیلمیری میلتر اؤز دپلینده سسین،

دونن کیمی چکه بیلمیرگئنه اولار نفسین.

قوراندا حالبوکی، آزاددی دپل ده، میلته ده،

قانار قورانی هر ائل اؤز دپلینده، البته.

قریبه اولکه دیر ایران، قریبه بیر توپراق!

اسیر بو یئرده همیشه و هر دقیقه سازاق،
 بو یئرده طولم و زنجیر آدی عدالتدیر،
 قارانیغین کی ایشیق، ذیلتین سعادتدیر،
 بو یئرده اینده ده میلترلره، آچیق زیندان،
 بشر شو عورونا دیوان
 قوران

بیر اؤلکه دیر ایران!
 بو یئرده هر نه کی، گورسن، ائشیتسن، عکسینه قان.

ایکیندی تهراندا
 ایکی موخالیف آخین،
 آدام و بیر ده ماشین،
 گورولتو تیرره دیری هر یانین دامین و داشین...
 آدین هر ایل دگیشن بیر گنیش خیاباندا،
 آدام سنلیله برابر داینامدان گنیرم،
 گنیر و سنیر ائدیرم
 اؤتوب کئچنلرین احوالین، اوز- گوزون،
 گنیمین

و دینلیرم دئیمین.
 چئشید - چئشیددی گنیملر: قیس، گنیش و اوزون،
 بنیزلری قاراشین،

آغ، آریق، توتوق، توتقون،
 دئیر گنیملری بعضاً گلیدیلر هاردان.
 اؤتور یانیمدان ایکی اوزلرینده عم اوخونان،
 و گوزلرینده بولود - چن کیمین غضلی دومان،
 گنیملری قارا، یاغلی، یاماقلی، دیزده چیخیق،
 و باشلارین توکو اورمان
 و ساققالا قاریشیق.

دئیردی آذریجه دوستونا یاواشجا بیری:
 - ائوین کیراسی اوچ آیدیر، وئره نمیرم، قالیری.
 - چیخارتسا، نئینه رسن؟

چاتیشماییر آلیق؟

- یاوان چؤرک پولونو کولفتین گورور زورونان.
 - هه ده! پنیر یوز اوتوز، دونموش ات، شکر سکسن،
 و اوچ تومن ده لاواش.

حؤکومتین بو ایشیندن، هنرلیسن، گه باش آج!
 - بیر آز یاواش!

- نییه؟ شهرده بونو بیلمه یین ده واردی مگر؟!
 - یاواش دئدیم، ائشیدیب، تورکسن، دئیه رلر خر،
 قریبه شئی دی بو فارس آدلانان برادرلر،
 دئیر گیلکلره هر یئرده کله ماهی خور،
 و کورده، داغ آپیسی،
 بلوچو سانمیر آدام

باشیندا شلمه سی، اگنینه آغ، اوزون دیشداس،
 هووئیزه لی عربه باخ گنیر جوان قیزینان،
 و سؤیلور آستا! شلونچ! حبیبتی، روحی؟
 اودور باخ، اونلاری هئی گؤستریب دئیر گنندن!
 اودور چه بیرتگه یئنه!

دئدیم یاواشجا بیر آز کی، یاییلماسین اییسی.
 قریبه دؤوراندير!
 دیلی یاساق ائدیلن ده، ائدن ده اینساندير!!
 بو توپراق ایراندير،
 کی، یوزده سکسنی خلقین آچیقجا زنداندير،
 یاغیر حقارت اونا هر طرفدن، هر یاندان،
 وورورلار تحقیر اوخون ایشده، سؤزده اوزلرینه،
 بو ائللرین دیلی، روحو، شوعورو دوستاقدیر،
 و یوخ اونون نه ائشیکدن سونو، نه داخیلدن،
 بو، ساده سؤزله دئمک ایسته سک، قول اولماقدیر،
 آزاددیلسادا گزمکده، یوخدوسا زنجیر،
 آزاد دیر اونلارا هر ایش، امک
 نوکر قول تک،
 آزادیلارکی، سورولسون حیات جیرگلری،
 بیین و قول گوجو، تا اؤزگه یه یاراتسینلار
 صباح اوچون مدنیت،
 بو گون اوچون لذت،
 و هئچ نه اوزلرینه!
 یاساقدی چونکی بو ایش،
 مگر یارین ایشی ایچین گرک
 بیر آز سنگک.

گرک بو میلتر
 چکیب فلاکتلر،
 آغیر رذالتلر
 چالیشسین اؤزلوگونو بیلمه دن بئله یای، قیش،
 سورو قویون کیمی ایزسیز عؤمور سوروب گنتسین،
 بولاردا اولمالیدیر تکجه ایش فولو و قارین،
 ولی نه آد، نه تانینما، نه دون، بوگون، نه یارین،
 نه آبیده، نه آنیت،
 نه درگیلر، نه قرئت،
 نه سؤز، نه بیر مدنیت، نه بیر یازی، نه پیتیک،
 نه باش- فیکیر و نه ده گؤز- گؤروش، شوعور و بیلیک.
 بیلر بو ایشلری ایراندا تکجه زیندانیان،
 یانی کوروش نوه سی، "داریوش" ائولادی،
 و بیر ده اؤزلوگون اینکار ائدیپ ده فارسلاشان،
 نه باشقا میلّت اولان کورد، تورک، عرب، تورکمن،
 اولابو اؤلکه ده بونلار فقط گرک زیندان،
 و ایشله ییب یارادان.

بیر اؤلکه نی پوزوب آنجاق اؤزون قوران،
 بنش - آلتی میلته قانداق ووران،
 اونون وارین،
 بازارین،

قودرتین،
 گوجون، حیاتین
 بوخوولایان و سوران،
 و اؤزلوگوندن قیران
 هنرت شهری تهراندا،

آدین هر ایل دگیشن بیر گنیش خیاباندا،
گوروب انشیتدیگی نین زهری قلب ائوپن گمیره رکن،
کئچیردی فیلم کیمین تاریخیم بوتون
نظریمدن
اؤتونجه عصرلر، آذر ائلی بو ایراندا
نه لر کی، ائتمه ییب اونون شوهرتی، قوامی اوچون!
تؤکوب نه قانلار او،
قویوب نه جانلار او،
بو ایرانین آدی، ایستقلالی، داوامی اوچون!
بو اؤلکه نین هاراسین قازاسان، آذری اییی وار،
و هر یئرین گزه سن، اورادا آذری هایى وار.
دونن و بوگون،
بو یئرلر آذرینین بئینی، قلبی، ات، سوموگوندن
یارانمیش اولدن،
بو یئرلر آذریه اولموش ایلك گونده وطن،
بو یئرلری آسوری جاینایندان آزاد ائدن
او فارس ائللین آسوری طولمو، همده بایلدن
خیلاص ائدیپ بورانی آدلی- سانلی دولت ائدن،
نه تکجه ایرانى، بلکه بوتون یاخین شرقین
ازیلیمیش ائللرینین زنجیرین قیران،
و قان ایچن آسورو "نئینوادا" دفن ائله یین،
بو میلتن و یئرین دوغدوغو "کیاکسار" اولوب،
اونون ایله بو یئر مستقل اولوب، وار اولوب،
و دوشمنی خوار اولوب.
سکندر اولدو راحت حؤکمرانی ایرانین،
بو اود دیاری ولی گورمه دی اونون آیاغین،
بو یترده ساخلادی زردوشتون ائل یانار چیراغین،
"ارشک" قیردی یادین آخیریندا طمطراغین،
و ایرانین گئنه قالدیردی بایراغین،
روما بئش یوز ایل اولار کؤکس گردی مردانا،
قازاندیلار تازا شوهرت و آد بو ایرانا،
نه فارسی ازدیلر اونلار، نه کوردو، نه عربی،
ازیلمه دی نه دیلی ائللرین، نه رسمی، دبی،
و حؤرمت اولدو دیله، میلته بونون سببی،
دیل ایله قدرتی اونلار آیردیلار بینالی.
چیخینجا اولدوزو ایراندا آل ساسانین،
دگیشدی هر بیر زاد،
چوخالدى محنتی خلقین، شاهین سا قالماقالی.
وورولدو دیلله بند،
و اولدو میلتن اسیر،
ائیدلدى تحقیر، آياقلاندى خلقلر، دیلله،
ازیلیمیش ائللره تحقیر، توهین اولدو آزاد،
وورولدو زنجیره سانکی جوشوب داشان سئلر،
و کوکره یین یئلر،
یانیب یوخ اولدو کیتابلار، یاخیلدی هم اسناد،
یازیلدی ترسینه کئچمیش بوتون حقیقتلر،
وئرینجه کاتبیه فرمانی اردشیر و قباد،
یوخ اولدو دفتر- تاریخده دونکو میلتنلر،

بو گون تک ایراندا
 و عصرلر اوزونو،
 فدا ائدیپ اوزونو
 بو توپراغا، ائله، گندیکلری شرف، هم آد
 یوخ اولدو سرتاسر،
 سیلیندی خیدمتلر،
 و توندو یئرلرین افسانهلر، حکایتلر.
 ولی حقیقتین عالمده چوخ یامان اوزو وار،
 یوز ایللر اؤتسهده، زور، گوجلہ سوسمایان سؤزو وار،
 حقیقتین اوزون اؤرتر قرینهلر توز تک،
 یاشار ولاکین او، اؤلمز، کول آلتداکی کؤز تک.
 زمانه اچدی ایچین آخیر آل ساسانین،
 و عدلی نین ایچ اوزون اچدی شاه کسرانین،
 بیلیندی کی، او مداین سیتم سراسی ایمیش!
 بوتون او نخوتی، او قودرتی، او دبدبہ نی،
 او بارگاهی، مدایینی، تختی، طنطنہ نی
 داغیتدی بیرجه اوج آج عرب راحتلیقلا،
 قورولسا طولملہ، ائللر دئمیش، اگر ائیوان،
 سونو اولار ویران.
 یوخ اولدو شوہرت ساسان ایله ایفبا، دیل،
 و ارثی خلقلره ذیلت اولدو، قانلی قیلینج،
 دئموکلیسین قیلینجی!
 و زنجیر اولدو، اسارت و گؤز یاشی، ماتم،
 و اؤیلہ دین کی، قوروب ذاتینی کدر و الم،
 و درد ایله غم،
 و یاددی روحونا شنلیک، صفا، گولوش و سنوینج،
 و دوغما دیر اونا ایلغیم و هر نه وارسا آجی،
 عمامه تاجی!
 بو زنجیری قیران آذر قیلینجی بابک ایدی،
 و غزنویدی و سلجوق ایدی، اتابک ایدی،
 بو صحنه لرده او تورک آلپ ارسلان تک ایدی.
 عرب قیلینجینی ایراندا سیندیران تورکدور،
 بو گونکو ایرانی ایران ائدیپ قیزیلباشلار،
 شاه اسماعیل و بئش- اون اردبیلی آغ باشلار،
 بوتون وجودو ایله خلقه باغلی سیرداشلار،
 و افغانین قیلینجین سیندیران دا نادر ایدی،
 و روس قولون دا بوروب قیرماغا او قادیر ایدی،
 آزادلیغی وئرن ایرانا "ستار" اولموشدور،
 بو تبریز ایله مجاهد و سالار اولموشدور.
 نه وقت تورکسوز اولموش بو باغری قان اؤلکه؟
 نه وقت تورک قانی ایلان یویولمامیش لکه؟!
 عجب! همیشه بو آذر، بو قهرامان میلت
 تۆکوب قانین قازانیب ایرانا شرف، عزت،
 ازیب یادی و وئریب ایرانا قاناد، شوہرت،
 و موزدو ایندی دپلیندن ده محروم اولماقدیر،
 و کؤلگه لر تک اثرسیز جهاندا قالماقدیر،
 بو گونکو دونیادا کی، هر کیچیک ائللین آدی وار،
 صداسی، فریادی وار...

بو دو یغولارلا قیزارکن قافام،
 گئدیردیم عالمه بیگانه بیلمه دن هارا من
 کی، بیر نفر یاناشیب سؤیله دی یاواشجا: سالام!
 عجب! بو کیمدی گؤرن؟
 قیرخ اوچ ایل قاباکی تانیش.
 قریبه دیر! تانییب ائله دیک شیرین خوش - بئش.
 تانیش آپاردی منی آخیرینده منزلینه.
 او قیرخ اوچ ایلدی بو ائوده تانیشدی فارس دیلینه،
 بابا سانیر اؤزونو اوغلانا، قیزا، گلینه،
 و حظ آلیر نوه دن،
 ائوینده واردی نه کی، ایسته سن،
 نه ایسته بیرسه معاصیر یاشام،
 ائوینده واردی تامام.
 کیتابلیغیندا کیتابلار
 یا انگلیسجه دی، یا فارسجا، آزجا تورکجه ده وار.
 خبر یاییر تلویزیون یاریم ساعات آخشام،
 فقط یاریمجا ساعات آذریجه تبریزدن.
 نه سؤیله بیر گؤره سن؟
 - امام - امت - جان بر کفین حضوروندا،
 وزیر- کشور و آموزش و کشاورزی،
 برای دانش و بهزیستی و بهروزی،
 قسم یثیبیلر کی،...
 دئدیم: حقارت بس،
 بیتر، بیتر، اونو دوستوم دو کس،
 و آلاهی عشقینه سوسدور داها کی بسدیر هوس،
 گرک دئییل بیزه اصلا بو آذریجه خبر،
 بو آذری دیلینه، خلقینه حقارتدیر،
 خبر دئییل بو، آچیقجا یاغان رذالتدیر.
 بو، ایرانین یاریدان چوخ شرفلی اینسانینا.
 توفو، حقارته کیم یول وئیرسه، وجدانینا.
 توفو، اونون قوخوموش بئینینه و ایمانینا.
 اونون عقیده سی و حورمتی نه تهران وار،
 نه دوغما خلقینه ایمانی وار، نه اینسانا وار،
 اونون نه حورمتی تورانا وار،
 نه ایرانا وار.
 او ایسته میر مدنیت، اسیر شوهرت دیر،
 اسیر واردیر او، مکتدی، مالدی، دؤولتدیر،
 غولام ثروتدیر،
 اسیر شهوتدیر،
 او قولدور اؤزگه لره، قول، غولام حلقه به گوش،
 یادین اؤنونده او، یوخ منلیگیله، یالوارراق
 ائدیر هر آن کورنوش.
 بو بنده لیکدن اونون فیکری، ذکری قدرتدیر،
 دیلینده خلقلره وئردیگی سعادتدیر،
 ولاکین ایشده، حقیقتده غمدی، محنتدیر،
 طبیعتی و یادا دایماً اسارتدیر،
 حیاتی خلقلرین درد دیر، رذالتدیر،

دیلینده سؤیله دیگی تاریدیر، دیانتدیر،
 قورآندی، دیندی، شریعتدی، حقدی، حورمتدیر،
 بؤیوک حقیقتدیر...
 ولی یالاندى سؤزو،
 و اگرى دیرده دوزو،
 تام عکسینه، بامباشقادیر ایچیله اوزو،
 یادیندیر، اؤزگه لرین، دشمنینکی دیر او گؤزو،
 اوزو باهاردی، گؤزلیکدیر، اینجه سانکی قوزو،
 ایچینده قوردور أمما، ایلاندى، شاختا، سازاق،
 جینایتین اؤزو، قاتیل و اینجه لیکدن ایراق،
 دوداقدای اینجه گولوش، آرخادا الینده پیچاق،
 اورکده زهر هلاهل، گولور اوزونده شافاق،
 اوزونده سئوگی، محبت، ایچینده کینه قلاق،
 اورک قارا، اوزو آغ،
 ایچی سازاق، اوزو یاز،
 وجودو، قلبی گوبوتلوقدو قوورا تک، اوزو ناز،
 گوجو قولوندا یوخ، انگینده دیر، الینده ده ساز،
 شوعورو دایاز،
 و رحمی، لوطفو بشر سئومک حیسسی، دو یغوسو آز.

نه دیر قیلینج؟ او یالنیز جینایت آلتی دیر
 و آرخاسیندا اونون بیر جهت وئرن ال وار،
 نه او جینایتی آنلار، نه بو، نه بارماقلار.
 بو بیر جوت آلتین آردیندا بیر ایراده اولار،
 اودور توتان تصمیم،
 اودور عدالته عامیل و یا جینایتکار.
 حقارت ائل دیلینه ساده بیر جینایتدیر.
 بیر عیده اینسانا اوخشار قیلینجی دیر، الی دیر،
 قولاقلاری آنادان گلمه سانکی سیرعالیدیر،
 و تهران اونلارا سنگر.
 و ایندی خلقیمیزین دویدوغو حقارتدیر،
 اونون اوچون ده حیاتی بوتون فلاکتدیر،
 یاشام دئمک اونا چوخدور، او بیر رذالتدیر.
 اؤتونجه ایل، سوموگه هر زامان چاتاندا پیچاق،
 جوشوب هارای قوپارار خلق سانکی آسلان نر،
 جوشار بوتون توپراق،
 جوشار عظام رمیم،
 و سیلکه نر یئرلر،
 قادین، کیشی، قیز، اوشاق،...
 جوشار و دالغالانیب کوکره بر بیر عمان تک،
 حوقوقون آماغا قادیر کوراوغلو اینسان تک،
 هارایلا عالمی مجبور ائدر دوشونجه لره،
 و سیلکه لر بشرین ویجدانین بو عوضیانلار،
 دالار درین فیکیره،
 بیلیر کی، وار هله زنجیری دارتان آسلانلار،
 و حقى تاپدالانلار
 و باغری آل قانلار.
 بو وقت تهران اونا آد وئرهر خیانتکار،

شریک بیگانه،
 وارام دئیهن متجاسر و بیلیمیرم داها نه.
 نجه کی، سؤیله دی قیرخ ایل قاباق سید جعفره،
 عزیز دوست سنه،
 و هم ده منه.

خبر زامانیدیر آچ بیر گؤرک
 نه واردیر عالمده.
 آچاندا، ناله بیتیب نغمه گولودو بیر دمده،
 بیر اؤلکه عئیشده اوزمکده دیر، بیری غمده،
 بیری چالیب چاگیریر، دیگرسه ماتمده،
 و سؤیله بیر دانیشان عشقله، حرارتیله
 فلسطینین ازیلن حاقی، یوردو، دردیندن،
 دئییر کمال مرارتله،

همده دقتیله
 بو خلقه اسراییلین ائتدیگی جینایتدن،
 فلسطین ائللرینه وئردیگی اسارستدن،
 وجودونو، دیلینی دانماغیندان حدتیله،
 دئییر، ساییر ائدلین طولمو، جور و نفرتیله،
 دئییر بو طولمله بیر قهرامان ائللین دؤیوشون،
 فلسطین ائللرینین مردلیگین، گوجون، ووروشون،
 ائتره دن دانیشیر، باسکدان و افغاندان،
 هایاندا بیر ازیلن خلق وارسا، اوندان،
 عراقدا کوردلرین حقی تاپدالانماقدان،
 دئییب دیفاع ائله بیر اونلارین حوقوقوندان،
 و قیبریسین دؤیوشون تورکلریندن حؤرمتیله،
 دئییر کی، ایسلام اولوب دایما حقیقتیله،
 دئییر و آیه اوخور هر سؤزونده قورآندان...

گونون گون اورتا چاغی،
 بئش- اون حرامی، یاغی
 آساندا بیر یازیغی،
 قریبه بیر اینسان،
 همیشه حاق باغیران،
 بینالی عدل ایله انصافا عالمی چاگیران،
 قریبه بیر اینسان
 دیفاع ائدیر آسیلاندان،
 غضبله تاپدایاراق هئی دمیر کیمین آیاغی،
 بئش- اون نفر قولو باغلی زاواللی اینسانین
 اوزون،
 گؤزون،
 بوغازین، سینه سین، سؤزون،
 شرافتین،
 هنرین، عزتین،
 کئچنلرین، هدفین.

آلین قیریشلی، ساچ آغ، ال قبارلی بیر پهلوان،

حیاتی مهستی لر تک دویان بیر آغ ساچ دول
 باخیب دئییردی لر آستا:
 - سئچیرسن اؤزگه گؤزونده ندن قیلی، بیلگی،
 سبب نه گؤرمه ییسن اؤز گؤزونده بس دیرگی؟
 - جینایتین نئجه اؤرتر سنین بو سؤز کلگی؟
 - دئوی بری ائده بیلمز اوزون ملک بزه گی!
 - دئییب ائل: اول ائوین داخیلی، سورا ائشیگی!
 - قاپاق گلنلیک ائدیر اؤرته تا جینایتینی!
 - ائوینده حاقینی وئر دوغما قارداشین، آکیشی،
 اوزاق ازیلمیشین حاقین ساوینماغین قالسین!
 - یادین غمینده یانانلار، قان اوتدورار دوستا؟
 - دویورمو هئچ، گؤره سن، بو ایشین نهایتینی؟
 - بیلیرمی اؤزگه لرین خئیرینه ائدیر بو ایشی؟
 - ندن چاپیر گؤره سن بالتا ایله اؤز آباغین؟
 ایله کورلاییر اؤز میثلسیز هنر بولاغین؟
 ندن وورور بئله اؤز بخت آیناسین بو داشا؟
 ترقیدن و سعادتدن ائیله ییر حاشا؟
 - گرک او آنلایاکی، قول یارانماز ائل بینادان!
 - اگر او آنلاماسا، آنلادار سونوندا زامان!
 - دوزه لده جک قوزودا، شوپهه سیز، زامان بیلگی!
 - ازنمز ائللری بیگانه یه گر اولماسا قول!
 - دئیین گؤرک، دوغولوب قول هاچان،
 هاچان،
 آنادان

هر هانسی بیر اینسان؟
 طبیعتین آناسی هر زادی دوغار آزاد.
 پئری، گؤیو، چیچگی،
 آیی، گونو، فلگی،
 نسیمی هم کولگی،
 مگر دوغولماز آزاد گؤی ائوینده قار پیلگی؟!
 بشر طبیعتین اوغلو، طبیعتین گولو دور،
 سبب نه دیر کی، بو میلت، او میلتین فولودور؟!
 سبب نه دیر کی، بو آچاقدی، دیگر اولودور؟!
 عدالتین می بو یول، یا حقیقتین یولودور؟
 عجب عدالتدیر!!
 عجب حقیقتدیر!!

چالیندی زنگ و دوستون گؤرونو احبابی،
 و هر بیرله نئجه اورتا بویلو قیز، اوغلان،
 و بیر ایکی نوه شئیطان کیمی، کیچیک حیرتدان!
 حیات قاینادی ائوده اولار گؤرونمی هامان،
 اوشاق طبیعتی نین بؤیله اولموش ایجابی.
 بنش - آلتی ثانیه ده چکمه دی تانیشلیغیمیز،
 گلنلرین هامیسی آذری و تورک بالاسی،
 و یئرلری ایسه ساراب، خوی، اهر، مرند، تبریز...
 دئمک بیر ایدی او ائوده، بؤیوک، کیچیک، دیلمیز.
 دئدیک بو گونکو حیاتدان، دوننکی گوندن بیز،
 صفاسی آزدی، ولی چوخدو زحمتی، عذابی،

کئچن گونو قارا، ذیلت، قارانلیق هم سوراسی،
 دانیشدی هامی کئچن درددن، فلاکتدن،
 دئییلدی درد، ولی آختاریلمادی چاراسی،
 دئیهن ده اولمادی درد اولسا گر، اولار داواسی،
 سؤز اوردا تکجه یاشاییش، قارین و زحمت ایدی،
 تک اؤلمه مکدن اؤتور ذیلت ایدی،
 مؤحنت ایدی،
 بیر عؤمر درد، فلاکت، ایرینلی غربت ایدی.
 سؤز اوردا، بلی! فقط درد ایدی، شیکایت ایدی،
 دئمک هدفسیز حیات!
 اوزو حیات کیمی قاینار، ولی ایچینده ممت.

آتوملو دؤوراندا،
 بؤیوک بیر اورماندا،
 ایتن یازیق بیر تات،
 فقط سو خاطرینه چارپیشیر،
 قاچیر، یانیر، آیشیر،
 هدف سودور اونا آنجاق، نه چاره دیر، نه نجات.
 قریبه دیر، گر اوچاغلار دا باغلی اولسا قاندا،
 سؤنوب اؤلرمی اولاردا، گؤرن، اوچوش هوسی؟!
 مگر گونش ایچی نین اولمامیش سسی،
 نفسی؟!

حیات ایپلری دوشموش دوگون
 اولاردا بو گون،
 بیکلرینده ولاکین گولن او پارلاق گون
 خبر وئریر داندان،
 خبر وئریر شافاقیندان
 گونشلی بیر یارینین
 کی، اوندا چکمگه عاشیق فراقین اؤز یارینین،
 کی، اوندا ائتمه به لر میلیتی زواللی سورو،
 سوروب ده قوومایالار کی، قاریندان اؤترو یورو!

تانیشدیلار بالالار بیر- بیرله سورعتیله،
 اوجالادی سس و دالاشماق صداسی شیدتیله:
 نکن، زن، توبدی ... سسلری اوجالماق همن
 جوجوق گلیب آتایا سؤیلهدی شیکایتینی:
 - بابا! ماشین حسن را نمیده بهمن.
 - برو، تو دختر خوبی، برو تو بازی کن.
 اوشاق گئدینجه سوروشدوم: نوهنمی دیر؟ آدی نه؟
 - نوهمدی، دوردانه.
 - یقین کی، فارس ائلیندن سئچیب اوغول گلینی.
 تعجب ایله دئدی: دوغما قارداشیم قیزیدیر.
 - سبب نه دیر به نوهز بیلیمیر آذری دیلینی؟
 - بو جور دور ایندی اوشاقلار.
 - ائشیتدیم، آما، دئیین بیر بونون نه علتی وار؟
 سبب نه عایله نین سیز پوزورسوز عادتینی.
 دوشونموسوزمو دریندن بونون نهایتینی؟
 بو وقتنه جن گولوشن اینسانین توتولدو اوزو،

یئره تیکیلدی گۆزو،
دگیشدی حالتی بیر لحظه ده باهار گونو تک.
دندی: باغیشلاپینیز!
یقین کی، گۆرمه میسیز تهرانین حیاتی نی سیز.
بیز آذریلره ایلغیم ائدیلدی تاکی، چۆرک،
دیاری ترک ائده رک،
علاجسیز بو یئره اوز قویوب گلندن بیز،
آلین تریله قازان دیکسا گونده بیر سنگک،
آچیق-آچیق بیزه هر یئرده تورکه خر دئیلر،
هایاندا اولدو آغیر ایش، گوج ایسته یین بیر امک،
توکوب آلبندان تر
اونو شرفله بیتیردیک،
ساغ اول دئمک یئرینه بیزلره موغول دئیلر،
آغیز آچانداسا، جاسوس، نوکر و سول دئیلر،
آچیق آداملیغا بیگانه، بی خبر دئیلر،
تاپان مقامی ایتیردیک،
و یاغدی هر یاندان
بیزه بینالی حقارت و تورکه خر دولوسو،
سئچیلمه دی بو حقارتدن آچاغی، اولوسو،
قوتارماق ایسته به رک طعنه دن، حقارتدن.
وجودومو گمیرن حبسدن، اسارتدن،
فیکیر وئریب نچه آی کئچدی فارسجا اؤیرندیم،
ولاکین ایندی ده یاتمیر ندنسه فارسا دیلیم،
بئله خیال ائله دیم ساده لیکدن اوللر
بیلینچه فارسجانی حتما بیتر زهر دیلر
چؤنر صفایا کدر.
قوتارمادیم گننه لاکین دوننکی محنتدن.
بو یول گۆره نده منی هر طرفده، هر یاندا،
ووروب گۆز آرخامجا،
یاواشجا سؤیله دیلر،
نیگا به لهجه یارو، پیا که، تورکه خره.
بوگون ده من دانیشاندا اولور همین فقره.
نه جور قوتارماق اولار، سؤیله یین، بو زینداندان؟
نچه تحمل ائده بونجا تحقیره اینسان؟
خاراب اولوبدو، کئچیندیرمیری آذربایجان،
بو یئرده بیر زیندان
و هم بوتون ایران!
نه دیر علاج، نه دیر چاره، بیر چیخیش، درمان؟!
چوخ اؤلچهرک، بیچه رک یوخلادیق ساغین، سولونو
تاپانمادیق یولونو.
کئچیب بیزیمکی، دوزه لمز داها بیزیم دیلیمیز.
مثل دئییر: دوزه لر قیبرده بو قوز بئلمیز.
بیزه حقارت اوخو، تا واریق بیز، اورتاقدیر،
بو جسمیمیز، جانیمیز، بیز دورونجا، دوستاقدیر،
ولی قوی اولمایا زیندان بیزیم اوشاقلاریمیز،
یانیرسا ساقه و کۆک، یانماسین بوداقلاریمیز،
و سؤنمه سین، بیز اؤلرکن، بیزیم چیراقلاریمیز،
داغیلما سین اتالاردان فالان تیفاقلاریمیز،

و سؤنمه سین داها، کور قالماسین اوجاقلاریمیز.
 بو درده چاره اوچون چانماییرسا گر الیمیز،
 اوشاقلار آنلاماسین قوی نه دیر سؤبوش، تحقیر،
 قوی اونلار اولمایالار بیز کیمین همیشه اسیر،
 قوی اونلار عؤمر انده لر باش اوجا، حقارتسیر،
 و هئچ ائشیتمه یه لر تورکه خر سؤزون ایدا!
 گر اؤیره نه بالالار فارسجانی اوشاقلیقدان،
 و تورکو بیلمه سه لر، لهجه اولماز اونلاردا،
 بیلرلر فارس کیمین فارسجان،
 و بیز تک اونلارین اولماز حیاتی پاک زیندان،
 گولر بیکلری، آلقیشلار اونلاری دؤوران،
 یاشار نه جورکی، سورهر عؤمر بیر آزاد اینسان،
 وئرهر او هم فرمان.
 دئدیم: کؤکون چاپیر، ای بینوا! سنین اؤز الین،
 اوشاقلارین سن اولانماز، یازیق!، اونوتسا دیلین.
 او فارس اولار و بودور دشمنین اساس هدفی،
 بیخیلسا دام، نه تاوانی قالار اونون، نه کفی.
 قانین، بیلین،
 ایچریدن، هم ائشیکدن اولاندا دوستاق سیز.
 دیلیزه اؤزلوگه مالیک بیر اؤزگور اینسانسیر،
 دیلین گئندنه نه اؤزلوک قالیر، نه شخصیت،
 سنین دئیل اوشاغین،
 کؤکون اگر قوروسا، وارمیدیر سنین بوداغین؟!
 همیشه لیک، ابدیلیک سؤنر سنین چیراغین،
 او ادلی - سانلی چیراق کی، یانیبیر آلتی مین ایل،
 اونو یاخیب و یانار ساخلایبیدیر اجدادین،
 قاسیرغالار قاباغیندا قویارکن اؤز جانین،
 اونوتمایارکن او اجدادی ایله پئیمانین،
 قالارمی هئچ کی، داغیلسین، گؤزوم، سنین تیفاغین؟!
 نه یاپراق ایستیسن آرتیق کسیر کؤکون اوراغین،
 و کور قالیر اوجاقین،
 یانان اوجاقسا، بزهر اؤزگه بیر ائلین دوواغین،
 سؤنور قاریندان اؤتور وارلیغین چیراغی او دیل،
 سوسور حیات بولاغین،
 یاخیر بیر اؤزگه چیراغی سنین حیات یاغین.
 سن اؤزلوگون قویاراق درده اختاریرسان ام،
 زاواللی! گر گئده اؤزلوک، گئدرسه میلیت،
 یوخ اولسا حیثیت،
 نه بین گرکدی سنین چاره، امچی، یا مرحم؟!
 خطر اولاندا اونا سوسما، ساخلا ما تم،
 دویونجا ذره قدره اوندان اولماق ایستیر کم،
 و یا چاتیر اونا نم،
 یانار داغ اول، آخاراق سنل تک عالمی یاندیر،
 کوراوغلو اول، داغا چیخ، وور، داغیت، قیریب سیندیر،
 وئرلمز حق، آلینار هر زامان، بو آیدیندیر،
 آزاد حیاتینا ضامیندی شاهینین جایناق،
 یولوندا جان قویانی، جان کیمی سئور توپراق،
 باشی و قودرتینه آرخالانمیش اصل قوچاق!!

سوسان آياقلاناجاق،
اینلهین ده محو اولاجاق،
طبیعتین ایشی، قانونو بؤیله دیر آنجاق!!

بو اؤلکه ایراندیر.
بو یئر اوغوللاری، میلتلری و ائللرینه
وطندیر آدا، ولاکین عملده زیندانیر.
بینالی بوردا حؤکومت
و قوللاریله ده قودرت،
بولوددو، زهر تۆکور چؤللری و گوللرینه!!
بو اؤلکه ایراندیر،
حقیقی زیندانیر
بو یئر اوغوللاری، ملتلی و ائللرینه،
بو زندانین نه ائشیکدن سونو، نهایتی وار،
نه اینسانین اورگیندن، ایچی و روحوندان،
بو یئرده حبس اولونوب جیسمله برابر جان.
بلی! نه تک اینسان،
بو یئرده زیندان ائدیلمیش فیکیر، شوعور، ویجدان،
و باغلیدیر بو سبیدن ده هم اوچوش قانادی،
یاساقدیر خلقلرین دیلرله بیرگه آدی،
بو غولموش حق دئیینهین بوردا دادی، فریادی.
بو یئرده حؤکم سوروب تخت و تاج، یا دستار،
و هر طرفده کئچن عصرلر حکایتی وار،
بو یئرده هر آدامین عؤموردن شیکایتی وار،
ترقی یاس توتاراق بوردا دایما آغلار،
بو یئرده بیر - بیرینی آلدادلارلار اورتاقلار،
بو یئرده حؤکم سورهر دوغرولوق آدیله یالان،
بو یئرده عدل ساییبیلار همیشه بیدادی،
یئری عاغیلایلارین بوردا داردی، یا زیندان،
بو یئرده بیر - بیرینه قویو قازار وطنداشلار،
و بیر - بیرین گؤره بیلمز نه دوغما قارداشلار،
نه اسگی یولداشلار،
بو یئرده حق دئسهلر بیر سؤزه، او باطیلدیر،
بیلیکلی سؤیلهسهلر هر کسه، او جاهیلدیر،
بو یئرده گؤز تیکیلیدیر یارین دئییل، دونه،
اؤلومدو پای او قدیم قیبله گاهدان دؤنه،
فلاکتی گؤرن اینسان گرک دئسین: منه نه،
آغیرلیق ائیلهیهچکدیر، دئمزسه، باش بدنه،
یانان شاما باخان اولماز، توتاللا یاس سؤننه،
قاشیر تک اؤز قوتورون بوردا عؤمر ائدن هر آدام،
اؤلومله قارشیلانار کیم کی، چکسه ائل غمینى،
بو یئرده هر یاشایان کور و کار گرک و عاوام،
قویون و ذلته خام،
اسیر دین، اوهام،
بئش اوزلو هم بدنار.

داغی، دوزو بو دیارین اگرچه نعمتدیر،
اگرچه هر یانی، یئر اوستو- آلتی ثروتدیر،

ولاکین هر یئری، هر بیر دیاری ویراندیر.
 اکن، قوران، یارادان، قایدادیر بو، اینساندیر،
 بدندی توپراق ازلدن، اگر بشر جاندیر.
 قریبه دؤوراندیر،
 اولور بو یئرده بشر نعمت ایچره آجلیقدان،
 دنیز ایچینده ایسه تشنه لب سوسوزلوقدان.
 کؤچور هامی، یاشایانمیر بو وارلی توپراقدا،
 نصیبی دیر بو خصوصیله اودلار اولکه سی نین،
 یئیر او ایندی ده مشروطه، فرقه نین آغاجین.
 آباد شهر بؤیوک ایراندا تکجه تهراندیر،
 و فارس منطقه سینده بنش- آلتی یئر و ماحال،
 و تهرانین سوپو گندوو، هاواسی توستو، ذوغال.
 بشر اوچور و آچیر کهکشانلار عالمینی،
 ولتیک بیز اکیریک نوح دؤورو تک زمین،
 و ائل چکیر یایی سو، قیش گونونده اود غمینی،
 ناغیللار عصری تک اینسان طبیعتین نوکری،
 قاریندان اؤترو آداملار یئرین دیلنچیلری،
 نه وار صنعت آخاریندان، نه علمدن خبری،
 فقط گزیر، سورونور،
 و کؤلگه تک گؤرونور.

آی - اولدوزن قاپی سین فتح ائدن اتوم باغیریر.
 یاتان ازیلمه لیدیر،
 طبیعت، اوغلونو اسرارین آچماغا چاغیریر،
 بیلک بو سیرری آچار،
 بو بیر دوگوندور آچار تکجه باشلار، اینسانلار.
 آچان بو اسگی دیارین بو گون
 بو کور دوگونون
 ازیلیمیش ائلری، میلتلری و خلقلرینین
 ذکاسی، قودرتی، فیکری، شوعورو اولمالیدیر
 نه یاد کی، یادلار الین چؤزولمز اصل دوگون
 آچار بلوچ ایله کوردون،
 عربلر ایله گیلک، تورک و فارس و تورکمنین
 بیر اولموش ال و ذکاسی،
 باشی، گوجو و صداسی،
 چیچکلنن باجاریقلار،
 قادین، کیشی نه کی وار!!
 تک الده یوخدو هاوار!

دگیشدیرن بو دیارین همیشه سیماسین،
 قیران یادین کمرین، قالدیران شرف بیناسین
 سهندین اولادی، اودلار دیاری میلتیدیر.
 بو خلق ایرانا باشدیر، اونون شرافتیدیر،
 بو ایرانین یاریدان چوخ نفوسو آذریلر
 گئنه اونون ائده جکلر ایشیقلی فرداسین.
 همیشه اؤنده گندر، قایدادیر بو، اسلان نر،
 بونو بو خلق اؤزونه بیر شرفلی بورج بیلر،
 بو بورجو ائل اؤده میس دایما شرافتیه،

نثار ائدیپ قانین، اؤز وارلیغین صداقتیله،
 دؤیوش جوانشیر ایله باشلامیش خلافتیله،
 اونوتمامیش قیلیجین بابکین بو داغ - داشلار،
 و هم شهامتینی،
 ختایی، تاجلوبگیم، اردیبللی سیرداشلار
 قوروبدولار بو دیارین بو گونکو دولتینی،
 یاییبلار شهرتینی.
 بوتون جهان ائشیدیر سردارین سسین هله ده،
 و سالارین آدی ایرانا سالدی ولوله ده،
 شاهین سارایینا سالمیشدی برک زلزله ده
 دونن سید جعفر.
 بو اؤلمز اینسانلار،
 گونش یولون آراییب آختارانلار،
 آسلانلار،
 آزاد حیات آراماق چین گرکلی مشعلر،
 ائدیپ وصیتلر،
 دؤیوش حیات یولودور،
 دؤیوش حیاتین اؤزوندن گرکلیدیر، اولودور،
 اسارته باش اگیب دینمه‌ین، قارین قولودور،
 گمیرمک آردی کسیلمز و سیلکمک یئرینه
 اؤپرسه بیر میلت
 اسارتین ایپینی،
 او کؤلگه دیر، یاشایانماز، حیاتی یوخ، اؤلودور،
 اونون گۆزونده شرافتدی چکدیگی ذیلت،
 او خلق چوخدان ایتیرمیش آداملیغین سایینی،
 دؤیوش شرفلی حیاتی سیرلاچیدیر، قولودور،
 آزاد حیاتی دایانماز دویوشله قان ساخلار،
 دایانمایان دؤیوشو بیرلیک هم ایمان ساخلار،
 و بیرلیگی ائلینه، خلقینه یانان ساخلار،
 شرفلی نسل اودور کی، اوخو نیشانا وورار،
 و دوغما خلقین آدین دفتر- زامانا وورار.
 ایگیت بو نسلی بیزیم روحوموزدا آلقیشلار،
 ایگیت او نسل اؤلومسوز یاشار، زامانلا یاشار،
 و هم ده دوغدوغو سردار،
 و هم یاراتدیغی سالار،
 و هم ختایی، کیاکسار.
 سلام او نسله، سلام!!

بو دور وصیتلر،
 بو دور سؤزو، اؤیودو بابکین، ختایی‌نین،
 جوانشیرین و قیزیلباشلارین و ستارین،
 و باغبانین و مجاهدلرین و سالارین،
 و چالدراندا، دؤیوش مئیدانیندا قویموش جان
 بنش- آلتی مین قوجامان، قهرمان قیزین، قادینین،
 و هم ده پیشه‌ورینین، قوچاق فدایی‌نین.

نه حالدا دیر بو ایگیت قهرامانلار ائولادی؟
 چاتیب‌می بونلارا هئچ اونلارین او فریادی

قاریندان اؤترو سورونمزدی، چاتمیش اولسایدی،
 اولوبدو سانکی، دوراردی او یاتمیش اولسایدی،
 اگر چاتایدی، تانیردی، بؤیوک بو خلق اؤزونو،
 و آتماز ایدی چورکچین ائوین، دیلین، سؤزونو،
 و طولمه یومماز ایدی بیرجه آن گؤرن گؤزونو،
 او پاتلایاردی یانار داغ کیمی حقارتدن،
 و کوکره پردی دنیزلر کیمین اسارتدن،
 قیراردی زنجیری، آزاد یاشاردی ائلر تک،
 جوشاردی، های قوپاراردی، آخاردی سنلر تک،
 دئیهردی هر قولغا دردینی او ینلر تک،
 آلاردی منطق ایله اعترافین هر بیرینین،
 صداسی شیمشک اولار حقی تاپدانان دیرینین،
 اسارتین قویوسوندان نجات تاپماق اوچون
 اندر هؤروکلرین اؤرکن سئویملی دیلبرینین،
 چاتینجا ایستگینه، تیتره در جهانی بوتون،
 حوقوقو تاپدالانارکن سوسان بیر ائل، میل
 جهاندا وارمی بو گون؟
 نه واردی بیر بئله میل، نه بیزده کی ذیلت،
 نه بونجا سای، نه بو قودرت،
 و نه بو صبر و حقارت.

قوی اودلانا،

کول اولاق، بوندان آرتیق اوددا یاناق،
 چورک دالینجا اولاق هر دیارا، خلقه قوناق،
 و قطبه تک ده قوناق،
 قویون گوله بوتون ائلر تمسخرانه بیزه،
 بو سایلا، کئچمیش ایله هیمت یلانه میزه!!
 دونن بیزه باش اگن، ایندی "چورنی ژوپ" چاغیران،
 ولوطف ائدهنده "باران"،
 و هم ده وارلیغینی قودرتیم، گوجومدن آلان،
 همیشه بیزلره هر یاندا تورکه خر باغیران
 بو بیر آوج میل،
 عجیب اقلیت
 بینالی یاغدیرالار گولله تک حقارت اوخون،
 ایاقلابیب ازهرلر بیزلرین وارین و یوخون،
 آدام دا سایماپالار هم اؤزون
 کی، بلکه بیز اوتاناق،
 بو وضعدن اوساناق،
 و میلی حقی قاناق!!

۱۱-۷-۱۳۶۷ تهران
 ۲۸-۱۰-۱۳۶۷ شبستر